

DE DISTRACTIONE. PIGNORUM.

8.28.1

Imp. Alexander A. Pacatae.

Fundum pignori obligatum, si creditor ex fructibus debitum persecutus est, cum ipso iure pignus obligatione liberatum sit, distrahere minime potest.

PP. id. Ian. Maximo II et Aeliano cons. [a. 223]

8.28.2

Idem A. Maximo.

Creditor, qui hypothecae seu pignori rem sibi nexam vendiderit, rem litigiosam non videtur vendere, quia precario debitor possidet.

PP. XII k. Oct. Maximo II et Aeliano cons. [a. 223]

8.28.3

Idem A. Luciano.

Hypothecis vel pignoribus a creditore venundatis in id quod deest adversus reum vel fideiussorem actio competit.

PP. III non. Nov. Maximo II et Aeliano cons. [a. 223]

8.28.4

Idem A. Crescenti.

Creditor hypothecas sive pignus cum proscibit, notum debitori fatere, si bona fide rem gerit, et quando licet testato dicere debet, si quid itaque per fraudem in pignore villae venditae commissum probate potes, ut inferatur actio, quae eo nomine competit, adi eum cuius de ea re notio est.

PP. k. Iun. Fusco et Dextro cons. [a. 225]

8.28.5

Idem A. Sossiano.

Si residuum debiti paratus es solvere, praeses provinciae dabit arbitrum, apud quem, quantum sit quod superest ex debito, examinabitur: et sive ad iudicem venire diversa pars cessaverit sive oblato superfluo ad venditionem prosiluerit, improba alienatio proprietatis tuae ius non auferet,

PP. XII k. Aug. Pompeiano et Peligno cons. [a. 231]